

Jesu, “Muelli oa Selekane se Secha



SABATHA MANTSIBOEA

Bakeng sa Boithuto ba Beke Ena Bala: *Ba-Heb.*

7:11–19; Ba-Heb.8:10–12; Jer. 31:31–34; Ba-Heb. 8:1–6; Exod. 24:1–8; Ezek. 36:26, 27.

Teman’a Khopolo: “Empa moprista e moholo oa rona o filoe tšebeletso e fetisang, kahobane e le ‘muelli oa selekane se fetisang, se hlabiloeng ka lipallo tse fetisang le tsona” (*Ba-Heberu 8:6*).

Ka ho phela bophelo bo phethehileng, le ka ho re shoela, Jesu e bile ‘muelli oa selekane se secha se fetisang mahareng a rona le Molimo. Ka lefu la Hae, Jesu o hlakotse kotlo ea lefu e neng e hlokeha ka lebaka la libe tsa rona ‘me a phethisa selekane se secha.

‘Nete ena e hlalosoa ho Ba-heberu 10:5–10, e hloaang Jesu e le ea bonahalitseng kutlo e phethehileng e hlokoang ke selekane. E bua ka Lipesaleme 40, eo qalong e buang ka takatso ea Davida ea ho fana ka kutlo e fellletseng ho Molimo: “Bona, kea tla, kamoo ho ngoliloeng taba tsa ka kateng, mmenong oa buka. Ho etsa ho ratoang ke oena, Molimo oa ka, ke sona seo ke se ratang” (*Lipes. 40:7, 8*). Pesaleme ena e bontša boemo ba selekane sa Molimo le Iseraele: kutlo e neng e ratoa le molao o ngoliloeng lipelong (*Deut. 6:4–6*). Empa seo Davida a neng a lakatsa ho se etsa feela, Jesu o se phethile.

Ho Pauluse, pesaleme ena e fumane bohlokoa bo khethehileng tsoalong ea Jesu. Jesu e ne e le sebopelo sa kutlo ea selekane se secha. Ke mohlala oa rona. Re bolokiloe, e seng feela ka lebaka la lefu la Hae empa le ka lebaka la kutlo ea Hae e phethehileng.

**Ithute thuto ea beke ena ho lokisetsa Sabatha sa la 19 Tlhakubele.*

Tlhokeho ea Selekane se Secha

Bala Ba-heberu 7:11–19. Hobaneng ha ho ne ho hlokeha selekane se secha?

Ho ea ka Ba-Heberu, taba ea hore Jesu o khethiloe ho ba moprista ka mokhoa oa Melkisedeke e ne e bolela hore selakane se secha se hlajuo. Selekane sa khale se ne se theiloe holim'a boprista ba Levi (*Ba-Heb. 7:11*). Baprista ba ba-Levi ba ne ba sebetisa joalo ka babuelli pakeng tsa Molimo le Iseraele, 'me molao o ne o behella batho ba bang bohle kathoko ho boprista. Sengoli se etsa qeto, ha ho le joalo, hore phetoho ea boprista e bolela phetoho ea molao oa boprista, le phetoho ea selekane (*Ba-Heb. 7:12, 18, 19*).

Bothata ba selekane sa khale ke hore se ne se sitoa ho fana ka phetheho (*Ba-Heb. 7:11*). Pauluse o bua ka boprista ba Levi le bosebeletsi ba bona (mahlabelo le mekete, jj.) mahlabelo a liphoofole a neng a nyeheloa ka tsona a ne a sitoa ho fana ka tlhoekiso ea 'nete e tletseng sebe, leha e le katamelo ho Molimo (*Ba-Heb. 10:1–4; Ba-Heb. 9:13, 14; Ba-Heb. 10:19–23*).

Taba ea hore selekane se secha se ne se hlokeha ha e bolele hore Molimo o hloketse Iseraele toka ha a ne a ba nea selekane sa khale. Litšebeliso sa ba-Levi le bosebeletsi ba tabernakele li ne li reretsoe ho ba thibela borapeling ba litšoantšo le ho ba supisa ho bosebeletsi ba kamoso ba Jesu. Ba-Heberu e tiisa hore mahlabelo e ne e le "liriti tsa litho le menono e tlang ho hlaha" (*Ba-Heb. 10:1*).

Ka hoba supisa ho Jesu, mahlabelo a thusitse sechaba ho bea tšepo ea bona le tumelo ho "konyana ea Molimo e tlosang libe tsa lefatše" (*Johanne 1:29; bapisa le Esaia 53*). Ke taba e tšoanang eo Pauluse a e buang ha a re molao e ne e le "molisa oa bongoana ba rona, ho re isa ho Krete, re tle re beoe ba lokileng ka tumelo" (*Ba-Gal. 3:24*) kapa hore "Kreste ke phetho ea molao, ho bea ea lokileng mang le mang ea lumelang" (*Ba-Roma 10:4*).

Ka mantsoe a mang, le Melao e Leshome, e le molemo e phethehile joalo, e sitoa ho fana ka poloko (*Ba-Roma 3:20–28, Ba-Roma 7:12–14*). E fana ka sekala se phethehileng sa ho loka, empa ha e fane ka ho loka, joalo feela ha ho icheba ka seiponeng ho ke ke ha tlosa menepe ea kholo. Bakeng sa ho loka ho phethehileng, re hloka Jesu e le ea nkang sebaka sa rona.

Hobaneng ha molao o sitoa ho re lopolla? Haholo-holo, haeba re boloka melao eohle, re e boloka hantle, ka tsela e hlokang sekoli—hobaneng ha seo se sitoa ho re lopolla?

Ncha le Nchafalitsoe

Bapisa Ba-Heberu 8:10–12 le Deuteronoma 6:4–6, Deuteronoma 30:11–14, le Jeremia 31:31–34. See se re ruta eng ka sebopeho sa selekane se secha?

Tšepiso ea selekane se secha ho Ba-Heberu e supa morao ho Jeremia. Ho latela Jeremia, tšepiso ea Molimo ea selekane se secha, hantle-ntle, e ne e le nchafatso ea selekane seo a neng a se hlabile pele le Iseraele ka Moshe (*Jer. 31:31–34*). Ho ka ba le maikutlo, he, hore Jeremia 31 e ne e sa bue ka selekane se “secha” ka tieo empa e ne e bua ka “nchafatso” ea selekane sa mathomo sa Iseraele. Hantle, lentsoe la se-Heberu bakeng sa bocha, hadashah, le ka ba le kabobeli moelelo oa “nchafatsa” le “e ncha-cha.”

Bothata ba selekane sa khale ke hore batho ba ne ba se roba (*Ba-Heb. 8:8, 9*). Selekane sene se sena le phoso; ke batho ba neng ba na le phoso. Haeba Iseraele e ne e fitle litšoantšisong ho ea ho Mesia ea tlang ho tla ‘me ba beile tumelo ea bona ho Eena, selekane se ka be se sa rojoa. Feela, ho bua ‘nete, ho ne ho na le balumeli ba bangata nalaneng ea Iseraele bao ka bona merero ea selekane e neng e phethoa ‘me ba neng ba na le molao lipelong tsa bona (*Lipes. 37:31, Lipes. 40:8, Lipes. 119:11, Esa. 51:7*).

Leha selekane se secha e le nchafatso ea selekane sa khale, ho na le moelelo o se leng secha e le kannete. Tšepiso ea Jeremia ea “selekane se secha” e ne se feela chebelo pele ea nchafatso ea lipehelo tse neng li le teng pele ho khleho, tse neng li rojuoe tsa nchafatsoa makhetlo a mangata kahobane sechaba se ne se khibetse bokoenehing makhetlo a mangata. ‘Me ke hobane feela sechaba se ne se se na thahasello ea ho boloka lehlakore la bona la selekane le Molimo (*Jer. 13:23*).

Kahona, Molimo a tšepisa ho etsa “ntho e ncha” (*Jer. 31:22*). Selekane seo sene se sena ho tšoana le selekane seo Molimo o neng o se etse “le bontat’a bona” (*Jer. 31:32*). Ka lebaka la ho hloka bontšepahi ba sechaba, litšepiso tseo Molimo o neng o li entse seleaneng sa Moshe ha lia ka tsa phethoa. Joale, ka boleng ba tiisetso e fanoeng ka Mora (*Ba-Heb. 7:22*), Molimo o ne o tla phetha merero ea selekane sa Hae. Molimo ha oa ka oa fetola molao oa Oona leha e le ho theola lipehelo tsa Oona; ho e-na le hoo o rometse Mora ho ba tiiso ea litšepiso tsa selekane (*Ba-Heb. 7:22, Ba-Heb. 6:18–20*). Ke kahona selekane sena se se nang lithohako. Se na le lithohonolofatso feela kahobane Jesu o se phethile ka ho phetheha.

Bala 2 Timothea 2:13. Re ka ithuta eng ka botšepahi ba Molimo ho sechaba sa Hae le ho merero ea Hae ha re lemoha likamano tsa rona le ba bang le ka merero ea rona?

Selekane se Secha se na le ‘Muelli ea Fetisang

Bala Ba-Heberu 8:1–6. Hobaneng ha Jesu e le ‘Muelli ea fetisang oa selekane?

Lentsoe la se-Gerike *mesitēs* (‘muelli) le tsoa ho *mesos* (“bohareng”) le supa ea tsamaeang kapa ea emang lipakeng. E ne e le lentsoe la tšebetso le neng le supa ea neng a etsa o mong kapa e meng ea mesebetsi e latelang: (1) monamoli mahareng a mahlakore a mabeli kapa ho feta, (2) ea buellang kapa mohoebi ea lipakeng, (3) paki boemong ba mantlha ba lentsoe leo, kapa (4) ea emang e le tiisetso, ‘me ka mokhoa o joalo, a tiisa phethahatso ea tumellano.

Lentsoe la Senyesemane “Muelli” le na le moelelo o fokolang haholo ho fetoleloa ho *mesitēs* ea se-Heberu hobane le tsepame feela tšebelisoeng tse peli kapa tse tharo tsa lentsoe leo la se-Gerike. Leha ho le joalo, Ba-Heberu e thathiselletsa tšebeliso ea bone. Jesu ha a talingoe e le “muelli” ka moelelo oa hore o khaola khang pakeng tsa Ntate le batho kapa ke ea bopang khotso ea boelanyang mahlakore a mabeli a sa khotsofalang moo ho nang le qoaketsano kapa e le paki e pakahatsang boteng ba konteraka kapa khotsofatso ea eona. Ho na le hoo, Ba-Heberu e hlalosa, hore Jesu ke tiisetso (kapa *molefelli*) oa selekane se secha (*Ba-Heb.* 7:22). Ho Ba-Heberu, lentsoe “muelli” le lekana le “motiisetsi.” O tiisa hore litšepiso tsa selekane li tla phethoa.

Lefu la Kreste le tliša tlhomamiso ea selekane se secha hobane le khotsofatsa tse hlokoang ke selakane sa khale le Iseraele, se neng se robiloa (*Ba-Heb.* 9:15–22). Ka moelelo ona, Jesu ke motiisetsi ea ipesitseng kotlo tsohle tsa molao o robiloeng. Moelelong o mong osele, ho phahamisoa ha Jesu leholimong ho tiisa hore litšepiso tsa Molimo ho batho li tla phethoa (*Ba-Heb.* 6:19, 20). Jesu o tiisa selekane hobane o bontšitse hore litšepiso tsa Molimo ke tsa ‘nete. Ka ho tsosa Jesu ‘me a mo beha letsohong la Hae le letona, Ntate o bontšitse hore o tla re tsosa ‘me a re tlise ho Eena.

Jesu ke ‘Muelli ea fetisang Moshe hobane o sebeletsa sehalalalong sa leholimo ‘me o neelane ka Eena hore e be sehlabelo se phethehileng bakeng sa rona (*Ba-Heb.* 8:1–5, *Ba-Heb.* 10:5–10). Sefahleho sa Moshe se ne se phatsima ke khanya ea Molimo (*Exod.* 34:29–35), empa Jesu ke khanya ea Molimo (*Ba-Heb.* 1:3, *Johanne* 1:14). *Moshe o ile a bua le Molimo fahleho li talimane* (*Exod.* 33:11), empa Jesu ke Lentsoe la Molimo (*Ba-Heb.* 4:12, 13; *Johanne* 1:1–3, 14).

E, Kreste o khotsofalitse kutlo eo selekane se neng se e hloka. Leseling lena, mosebetsi oa kutlo ke ofe bophelong ba hau, ‘me ke hobaneng ha e ntse e le bohlokoa haholo?

Selekane se Secha se na le Litšepiso tse Fetisang

Re ka ba molekong oa ho nahana hore selekane se secha se na le “litšepiso tse fetisang” ka moelelo oa hore se na le meputso e fetang eo selekane sa khale se neng se na le eona (lehae le maholimong, bophelo bo sa feleng, jj.). ‘Nete ke hore Molimo o ntse a fane ka meputso e joalo le ho balumeli ba Testamente ea Khale joalo ka ha a re file le rona (*bala Ba-Heb. 11:10, 13–16*). Ho Ba-Heberu 8:6, “litšepiso tse fetisang” e buang ka litšepiso tse mefuta e fapaneng.

Selekane se mahareng a Molimo le Israele e ne e le phapanyetsano ea semolao ea litšepiso mahareng a Molimo le Israele. Molimo o nkile khato a lopolla Israele Egepeta ‘me a ba tšepisa ho ba etella pele ho ea Lefatšeng la Pallo.

Bapisa Exoda 24:1–8 le Ba-Heberu 10:5–10. Liphapano le ho tšoana ke ho fe mahareng a litšepiso tse peli tsee?

Selekane se mahareng a Molimo le Israele se ne se lokisoa ka mali. Mali ana a ne a fafatsoa kabobeli holim’a aletare, e neng e tšoantša Molimo, le litšiea tse leshome le metso e ‘meli, tse neng li emetse batho. Sechaba sa Israele se ile sa tšepisa hore se tla utloa sohle seo Jehova a se buileng. E ne e le tšepiso e halalelang ‘me ea hlokoa le ho rona ha re kena selekaneng le Molimo.

“Pehelo ea bophelo bo sa feleng e seo esaleng e le sona hona joale joalo ka pele—seo e neng e le sona Paradeising pele batsoali ba rona ba pele ba e-oa—kutlo e phethehileng molaong oa Molimo, ho loka ho phethehileng. Haeba bophelo bo sa feleng bo ne bo ka fanoa ka pehelo e ‘ngoe e ka tlase ho ena, thabo eohle ea tsohle tse bopiloeng e ne e tla ba tlokotsing. Ho ne ho tla be ho buletsoe sebe khoro, le mophula oa sona oa maoma le mahlomola, se sa tlo fela.”—Ellen G. White, *Steps to Christ*, leq. 62.

Molimo o khotsofatsa tse hlokoang ke selekane se secha ka botlalo hobane o neelane ka Moea oa Hae ho tla phela bophelo bo phethehileng e le hore litšepiso tsa selekane li tle li phethoe ka ho Eena, ‘me e be moo re li neoang, ka ho lumela ho Jesu. Kutlo ea Jesu e fane ka tiisetso ea litšepiso tsa selekane (*Ba-Heb. 7:22*). Se hloka hore Molimo a mo fe mahlohonolo a selekane, e be a neoa rona. Efela ba le “ho Krete” ba tla ba le kabelo litšepisong tseo le Eena. Ea bobeli, Molimo o re nea Moea oa Hae o Halalelang hore o tle o re nee matla a ho phetha molao.

Kreste o khotsofalitse liphelelo tsa selekane; kahona, phethahatso ea litšepiso tsa Molimo ho rona ha e na qeaqeo. Taba ee e u thusa joang ho utloisisa se boleloang ke 2 Ba-Korinthe 1:20–22? Ke tšepo e fe e makatsang e fumanhang moo bakeng sa rona?

Selekane se Secha se Rarollotse Bothata ba Pelo

Bapisa litšepiso tsa selekane se secha ho Jeremia 31:33 le Ezekiele 36:26, 27. Li amana joang?

Tokomane ea selekane sa pele e ne e ngotsoe ke Molimo holim'a matlapa a lejoe 'me ea tšeloa ka arekeng ea selekane e le bopaki ba bohlokoa ea selekane sa Molimo le sechaba (*Exod. 31:18, Deut. 10:1-4*). Tokomane tse ngotsoeng lejoeng, leha ho le joalo, li ka rojola, le 'meno, joalo ka ha Jeremia a ile a fihlela, li ka taboloa 'me tsa chesoa (*Jer. 36:23*).

Empa joale Molimo o tla ngola molao oa Hae lipelong tsa batho. Pelo e bolela kelello, setho sa khopolo le kutloisiso (*Jer. 3:15, Deut. 29:4*), haholo moo liqeto tse hlakileng li nkuoang teng (*Jer. 3:10, Jer. 29:13*).

Tšepiso ena ha ea ka ea fumanela bohle monyetla oa ho tseba molao feela. E boetse, 'me sa bohlokoa ka ho fetisa, e ne e tlisa phetoho lipelong tsa sechaba. Bothata ba Iseraele e ne e le hore sebe sa bona se ngoliloe ka "moseto oa tšepe," "ka daemane e nchocho. . . leqepheng la lipelo tsa bona" (*Jer. 17:1*). Ba ne ba hana ho utloa (*Jer. 13:10, Jer. 23:17*); kahona, ho ne ho le thata ho bona ho etsa se nepahetseng (*Jer. 13:23*).

Jeremia ha a ka a phatlalatsa phetoho ea molao, hobane bothata ba Iseraele e ne e se molao empa e ne e le pelo. Molimo o ne a batla botšepahi ba Iseraele e be karabo ea teboho ho seo a ba etselitseng sona; joale, a ba nea Melao e Leshome ka selelekela se se nang nalane, a bolela lerato le tsotello ea Hae ho bona (*Exod. 20:1, 2*). Molimo o ne a batla Iseraele e utloe molao oa Hae e le kananelo ea hore o ba batlela tse molemo ka ho fetisisa, 'nete e senotsong topollong ea bona Egepeta. Kutlo ea bona e ne e lokela ho ba pontšo ea teboho, ponahatso ea bonnete ba kamano ea bona.

Ho joalo le ka rona kajeno. Lerato le tsotello ea Jesu ka ho re shoela ke selelekela sa selekane se secha (*Luka 22:20*). Kutlo ea 'nete e tsoa pelong e le pontšo ea lerato (*Matt. 22:34-40*). Lerato lena ke letšoao le khethollang la boteng ba Moea o Halalelang bophelong ba molumeli. Molimo o re tšollela lerato la Hae ka Moea o Halalelang (*Ba-Roma 5:5*), le bontšoang ka lerato (*Ba-Gal. 5:22*). Ke eng eo re ka ithutang eona ho tsoa paleng ee ea Elia ka ho re na hobaneng, ho sa natsoe hore na re ikutloa re le babe ha kae, ka matla a Molimo re hloka ho tsitlalla le ho se inehel?

Haeba Iseraele ea khale e ne e lokela ho rata Molimo, leha e ne e sa utloisisa lefu la Kreste, hobaneng re sa lokela ho rata Molimo ho feta kamoo ba entseng kateng? Kutlo e bonahatsa bonnete ba lerato leo joang?

Ho Ithuta Haholoanyane: “Haeba lipelo tsa rona li nchafatsoa ho tšoana le ea Molimo, haeba lerato le halalelang le ka jaloa moeeng, a na molao oa Molimo ha o na ho ntšetsoa pele bophelong? Ha tšiea ea lerato e jetsoe ka pelong, ha motho a nchafalitsoe ho hore e be setšoantšo sa Eo ea ‘mopileng, tšepiso ea selekane se secha ea phethoa, ‘ke tla kenya melao ea ka lipelong tsa bona, ke e ngole likelellong tsa bona.’ Ba-Heberu 10:16. ‘Me ha molao o ngotsoe pelong, a na ha o ka ke oa bopa bophelo? Kutlo—tšebeletso ea bolateli ba lerato—ke letšoao la ‘nete la borutuo. Kahona Lengolo le re, ‘Hobane ho rata Molimo, ke ha re boloka litaelo tsa oona.’ ‘Ea reng: kea o tseba, kanthe ha a boloke litaelo tsa oona, o leshano, ‘me ‘nete ha e eo ho eena.’ 1 Johanne 5:3; 2:4. Ho na le ho lokolla motho kutlong, ke tumelo, ‘me tumelo feela, e re fang kabelo ea mohau oa Kreste, o re fang matla a ho ba le kutlo . . .

“Ha u ntse u atamela ho Jesu, u eketsa ho ipona liphoso; kahobane pono ea hau e tla hlaka ho fetisa, ‘me likoli tsa hau li tla bonahala pepenene khahlanong le sebopheho sa Hae se phethehileng. Hona ke bopaki ba hore thetso tsa Satane li feletsoe ke matla a tsona; hore tšusumetso e hlasimolosang ea Moea oa Molimo ea u tsoa.

“Ha ho lerato le tebileng la Jesu le ka lulang ka pelong e sa ikelelloeng boetsalibe ba eona. Moea o fetoloang ka mohau oa Kreste e tla lakatsa semelo sa Hae se halalelang; empa ha re sa bone bokooa ba rona ba boitšoaro, ke bopaki bo sa foseng ba hore ha re so be le pono ea botle le pabatseho ea Kreste.”—Ellen G. White, *Steps to Christ*, maq. 60, 64, 65.

Lipotso tsa Puisano:

- ❶ Nahana ka lipolelo tsa Ellen G. White tse kaholimo. Taba ea hore ha re ntse re atamela ho Jesu, re eketsa ho bona bobbe ba rona e re bolella ena ka kamoo ho ipona likoli ho sa lokelang ho re lahlisa tumelo le ho nyahama?
- ❷ Tsitsa tabeng ea hore molao o ngotsoe lipelong tsa rona. See se bolela’ng bakeng sa bophelo ba moea ba Mokreste? Ho utloisisa le ho fihlela ‘nete ee ho ka re thusa joang ho qoba mofuta oa “kutlo” oo e leng poloko feela ea molao, kutlo e bitsitsoeng “mesebetsi e shoeleng” (*Ba-Heb. 9:14*)?